

懷德縣志第十五卷

藝文志

清續通志云鄭樵志藝文略有十二類類各分門門各標目自叙以爲經籍之散亡由於編次之無紀所蓋著篇目存亡而非尋章擇句也下至邑乘亦采名宦宿儒文人騷客諸作名曰藝文較之通志誠行潦之與河海矣然昭一邑之文光備將來之攷證亦未必無小補焉懷德地處荒徼開化最晚而間出彥儁立言亦自不朽爰輯吾懷名宿所著詩文著於篇而時人著作采其有關於事實攷證者亦附於篇末藉以存國粹於萬一云述藝文

碑記

御製明倫堂臥碑條約

朝廷建立學校選取生員免其丁糧存以廩膳設學院學道學官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列於後

一生員在家父母賢智者子當受教父母愚魯或有非爲者子既讀書明理當再三懇告使父母不陷於危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術

邪刻讀書必無成就爲官必取禍患行害人之事者往往自殺其身當宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入即有切己之事止許家人代告不許干預他人詞訟他人亦不須牽連生員作証

一爲學當尊敬先生若講說皆須誠心聽受如有不明從容再問勿妄行辨難爲師者亦當盡心教訓勿致怠惰

一軍民一切利病不許生員上書陳言如有一言建白以違制

論黜革治罪

一生員不許糾黨多人立盟結社把持官府武斷鄉曲所行文字不許妄行刊刻違者聽提調官治罪

大清乾隆三年歲次戊午夏四月上浣穀旦

禁止私立稅局碑

在城內財神廟咸豐元年七月鄂從新等立

喬向榮

樂亭

盖聞譏而不征熙朝之盛典塵而不稅治世之良規是以以有易無有司法之通功易事司氏掌之此皆古聖王之德也我朝定鼎以求德媿唐虞功邁三代郅治之隆雖漸被暨訖無不共沾深恩綏甸要荒無不咸感至德故由中達外莫非聲教聽及之地猗歟休哉何其隆也茲昌圖境內八家子屯自道光元年

蒙恩出墾王荒借地養民彼其時草木暢茂禽獸繁殖寂寞荒涼之景疇不顧却不安哉迨至積年累月比戶蕃庶人民稠密舖舍星陳商賈雲集視昔日之荒阜已改爲當年之盛境矣乃於道光十二年間有昌圖廳濟天家人鄒二勾串差役在八家子屯私立稅局蒙官舞弊張掛稅牌肆行無忌斯時也凡我商民無不啞口無言以任征役之擾攘實屬莫能伊何者幸有德合店財東劉殿侯識破虛僞當即同鄉約初玉珍等赴盛京請示蒙刑部祥大人批左司承天訊斷所有諭令各緣由均載明案牘不復冗叙等因迄今十有餘年無敢罔越第恐歷年久遠湮沒無傳後有不法之徒視爲利藪違諭抗斷再行私立稅局

不惟使劉殿侯等前功盡棄而國家之餘恩亦何能感戴於無涯也哉是以各社商民人等公議勒銘刻碑以荷王道之無偏並誌成案之有鑒以爲永垂不朽云爾

南三道崗關帝廟碑

金身入夢行參乘於西天碧屋騰祥接法乳於南海心參造化而化成化也無方道合無生以廣生生焉不匱眼前皆赤子一身徧大千三千室內 青春奕世消塵劫億萬實爲萬物之父母寧止羣蒙之津梁以故玉闕瓊宮焜耀宇宙香烟楮霧充滿寰區崇奉之隆於斯爲極昌圖廳三道崗舊有三仙娘娘宮殿其由來三十餘年矣初爲草庵後易瓦甃其地則河山縈帶嵐

樹叅差夕陽笠簔坐聽樵歌之出沒閒庭杖履細看泉壑之晴  
陰白石峯頭時有幽人吟夜月杏花深處常聞騷客醉芳春洵  
可適情是爲清景特以歷年滋多舊殿漸圯法像塵滿空歎風  
雨淒淒虛壁苔生無復棖桷煥煥馬道彌寂寞祇留明月照香  
燈古壁半凋零惟有松風敲夜磬且也三道崗爲諸會之首領  
詎可以廟貌之觀瞻不肅而令衆會之談笑者哉是以更新之  
舉起於道光庚戌兼創伏魔大帝四方之善男信女仁人義士  
不謀而同咸樂捐資以成重大之工程歸善輸財者何下千萬  
人矣求木鳩工非一日之經營忽於咸豐甲寅始告成於崇朝  
吾人瞻拜之下後宮前殿皆煥然一新斗率宮凌霄殿大抵無

過如是夫竊思忠臣孝子猶得立碑墓道以風生前之規範况  
其三仙關帝胡不鐫珉剝方以表化後之靈應然天無三光而  
不明碑無鳥篆而不彰維時會首張公成邦等索記文於余余  
曰噫嘻僕學疏才短倘有負於託豈不遺笑於大方乎竟三辭  
而不得既而自思曰受諸神之護佑已久矣蒙張公之恩德已  
深矣當年地僻人稀賊匪蜂起晝則行劫夜則爲盜即五歲之  
童子七齡之幼女坐不安席寢不成夢大荒之民殆無恆心幸  
有張公糾合鄉勇以農器而作兵器以農夫而作武夫朝團暮  
練專膺不法之匪徒故三道崗之居民皆得以享太平耳時值  
我

皇上龍牌並將軍大人奕公堂劄遍行天下曉諭四民鄉社井里准立團練會以防不虞倘有賊匪侵入合力擊之云云張公等承牌劄之命會事加修賊匪遠遁路不失遺之教雖無夜不閉戶之風猶存故而秦關以東推爲諸會之盟長雖張公之德行所致實賴諸神之蔭庇者也因而援筆作歌曰雲山蒼蒼江水洋洋鬼神之德山高水長敬修短章永誌不忘

李雲祥

王成玉

整理會事人

序誌人張天彝敬撰

張成邦

劉官

大清咸豐三年

蓋聞爲善降祥惟奉神明而可致施財積福誠建廟宇以能徵道經云種蘭得香種粟得糧是也夫本宮廟宇神像羣牆衛路山門昔竟備訖只因已逝先師陳公老人德薰有感蒙科爾沁達爾罕王東公益局局員濫得王胞弟二品台吉色冷那木級拉忽生虔心偶發善念願將本宮自置生荒熟地其他租項一概施捨以爲神前香資昔兌出者令佃戶與本宮交租自耕種者蒙古永不徵租所施者專爲道衆朝夕持奉香火朔望課誦經典四時供獻永不缺乏上祝皇清鞏固次祈王爵祿位增崇

嗣裔蕃盛百代簪纓再者年前本宮師徒又將前後大殿明柱格扇重新油畫本年有衆會等協力領化四方善士信女樂施資財甘捐銀兩成全善功證無上果立石旂竿一對更覺顯助神威以肅觀瞻較比前番整齊多矣如上等因爲一方保障作萬戶津梁士農工商皆賴是而康泰矣於斯見蒙王德莫大矣爲此本宮道衆感施主善行故勒碑以彰其功德云爾特問碑文於予自不揆己才拙學陋作斯鄙文勒於石陽以欣鄉民賭悅多取詰士見哂於此謹題

潛修居士長安子撰文

山左羅順字翔雲書瞻

大清同治九年榴月

穀旦

關帝廟碑文

蓋聞修功建廟爲出家之首務塑神造像乃學道之始行及乎誦經禮懺悟眞參玄莫不賴於是矣茲者因我先師祖上來下聰張公諱學聖出家於吉林西龍泉山青華宮由嘉慶二十三年自備銀兩親來本境寫得王荒五百七十頃城內舊有土殿前後兩間故以此荒開墾豫作本處香資因已無力不能全開其間有兌與他人者多矣淨剩荒產墾成熟地以爲自用至道光十八年我先師等見廟頽圯不忍坐視將自積銀兩意欲建修恐有不足故立緣簿募化四方善士共助資財重修殿庭新

塑神像後殿塑娘娘聖像三尊前殿塑關聖帝君像一尊左塑藥王聖像一尊右塑龍王聖像一尊羣牆衛路山門悉具又立經箱演門徒習經誦懺朝禮仙真上報天地君親師之四大重恩下濟地獄餓鬼畜之三塗罪苦道化興行法嗣經修香大綿遠所有窪荒不能開地者留作牧廠預自利而利人也凡有熟地生荒不可出兌貽作本宮費用後有承繼焚修者宜謹遵太上清規不得葷酒壞教敗宗切毋雜入行教不可信投旁門欲後有憑今故勒碑以誌之而永垂不朽矣

大清同治九年榴月立

懷德縣署問心碑

光緒二年改建縣公署立

知縣張雲祥

懷德縣志

卷十五藝文 二十一

新京福文盛印書局印

問心無愧古人所難余何人能以此自命蓋因數十年來遇事則反心自問頗有所得茲值堂成銘以自勉

### 建修文廟碑

光緒元年五年迭經各大憲奏准昌圖廳改設府治改八家鎮爲懷德縣定文武學額各二名飭建文廟學署以符體制於是  
我懷德縣尊張公訓導許公實司其事五年春縣學合商興工  
遴派紳商夫役監工建修遂將所派人等合銜榜示其一切事  
宜皆聽指授請而後行是舉所需款項先蒙上憲籌酌撥銀三  
千七百兩陸續領發嗣後工多欸絀縣尊首捐捐廉是時學署  
訓導杜公任此集邑紳富共酌捐輸以成斯舉計各饒戶樂捐

未必加量里劑銖兩同均第此欵動用涓滴爲公先後在事各人俱承教來效急公忘私茲追述梗概俾知我懷邑幸賴張杜諸公振興文教公正率下始終妥善以成鉅典而啟懷人且廣恩體育雅意以光國家右文之盛則懷之人躬被其澤永久弗緩工竣勒石計如左

節孝崔孺人碑

竊聞內則之儀莫先於順中壺之德無過於貞觀夫竹以節而彌高萱無憂而益茂益信福祿常宜於後聲名早炳於先也如

欽旌節孝張母崔太孺人有足述焉 太孺人者例貢生崔公

學孔之女張公麟閣之原配也德懋珩璜肅靜嫻於婦誠職優糾紆纂組精其女工斯爲秀毓名門可卜配逢嘉耦年二十一于歸張公桓車對挽萊畚同操上而盡滌澹之誠內而爲藁砧之助無殊饁野之賓共羨持門之婦不意鴛辭鏡影誰憐宛轉中宵鶴別琴聲未可捐軀長夜 太孺人則一心飲蘖十指捋茶堂上之白頭待養膝前之黃口終虛族人議以堂叔弟墨林之子名維藩爲嗣 太孺人撫螟蛉如己出俾燕翼之永綿誦明訓於大家紹義方於陶母列經四壁願杼一鐙紡織不休呶唔相應體向平未竟之心昌延五世補師氏不言之教譽溢三宗用能弓冶相傳簪纓克繼於光緒



八年冬經紳士丁述銘袁學宏陳芷文劉樹楨劉鶴泉宋含章等據實繕呈蒙本懷德縣尊張公恩准詳請是以台憲揚聖善之化

朝廷錫綽楔之榮翰墨表於搢紳之倫芳徽騰於里巷之口迴想恨欲磨笄身將化石之心其亦可以大慰也矣本儒學舉揚穆行未與郅隆而敷陳詞章敢辭謏陋是爲記並係以銘曰德盛存嗣修行爲整閨闈之美實備於茲惟太孺人身兼有之草難獨活蘭自生香名泐貞石身其康強

吉林長春廳王迎壽撰

馬士麟書

光緒十年五月穀旦建坊

元寶山杜烈婦碑

烈婦者嶽雲公杜信之次女也光緒二年年二十歲適尙修公袁懋之長子相國宜室宜家克執婦道次年夫相國年十八歲從族叔袁子芳肄業七月抄染病在塾嗜學不歸病篤父兄延醫往視皆以爲採薪之憂耳不幸天奪其年竟於八月初六日與世而常辭也乃具衣衾備棺槨車載而家焉婦則悲慟非常一哭一死初八日戌刻背翁姑家人吞藥而殉焉里巷警聞且慟且感以爲綱常在天地巾幗大有美賢也先時鄉約陶清鄰右李慎言等請旌未果嗣因改廳爲縣經衍聖公府齎奏丁述

名奉直大夫魏奉璋金州儒學正堂于鳳池昌圖拔貢生榮文  
達等據實呈請邑侯雲祥張尊照例申詳旋蒙列憲奉准天聽  
我  
皇上嘉其節烈用振綱常昭旌揚之盛典俾踴躍以建坊  
光緒七年恩詔已頒焉今鳩工已竣鄉之人屬予作文以記之  
敢實錄

四品封典魏鍾筠篆  
本邑文童馬駿聲書

大清光緒十二年八月穀旦建

無量宮碑文

蓋聞德莫厚於便民功莫大於利衆古人之所謂立公德於不

朽者良有由也茲吾楊大城子無量宮廟舊有糧市一區規模  
雖簡而爲益良多嗣光緒初年而中廢集市者莫不扼腕撫膺  
以爲事左而費冗也是以道長樊公字教魁仙號殿臣者無量  
宮監院人也長存心方便之門且厪念於普利之路不憚其煩  
請之官府仍復舊市之規領有雙印官斗每斗用只五文糶者  
四而糶者一一鬪之市囂爭一息其義美其法良已於是近者  
悅遠者以來懷德而頌功者比比然也然有功而不顯其功多  
沒有德而不彰其德將湮以故岫嶠勒大禹之功峴山紀羊公  
之德古人往矣而片石千秋後之視今猶今之視昔後賢之  
興舊章足率千世無以易也爰以勒樊公之功與樊公之德永

垂於不朽云

盧德行撰

薛松軒書

大清光緒十二年十一月十二日

禁革赭衣車費碑文

光緒十八年邑庠生

袁子芳

地方之利弊民生之休戚係焉爲民父母者孰不欲除弊以興利而卒能弊絕風清者甚寥寥也蓋弊不一端一時之弊易除多年之弊難除一家之弊易除萬戶之弊難除其弊之隱微不顯而諸弊雜出其中尤未易除吾邑有弊政焉凡招解命盜諸案一切之資向攤取於出事地方名曰赭衣車費其始不過借

資民力而已繼則積久相沿莫之更議迄今已數十年矣邊地民風好鬪良莠不齊人命盜劫之案各社皆有攤費之家難更僕數每解一案民攤百金屢解屢攤一案不了攤派無窮如蠹役惡約訛索多端民不堪命其間之刁滑者圖省攤派小費私和地方巨案遂有匿命諱盜之弊而上之拘泥者往往攤累之於民則不忍出之於己又不能又有壓案積牘之弊久懸滋遂至百弊叢生而無可補救惟我筱泉賀公深究弊源洞燭弊竇下車伊始即毅然禁革清釐積案百數十起一切費用悉出捐廉不取於小民尤恐年遠變易遂俯從紳耆所請稟准各大憲立案永遠革除舉向之億萬戶痛心疾首積數十年莫能挽

回者塞其源清其竇俾吾民休焉息焉脫然無累後雖有作弊之人舞弊之心而不得借此以魚肉吾民可謂一弊除而百弊皆除也已夫賀公之善政多矣而獨記此者非略也除凶暴以安良善遇災歉而施賑濟設書院建義塾凡所以教養吾民皆彰彰在人耳目無待記也惟剔弊於隱微不顯而樂利莫可名言敬勒貞珉粗傳崖略以示不忘之意云爾

輔翼書院碑記

光緒十八年二月運同銜懷德縣知縣

賀頊

國家養士於學迪以師儒厚以廩餼考以道藝良德美意燦然備矣而推法外之意使有所居游相觀而善變弇陋以宏通樹閭閻之坊表以仰副聖天子作人之雅化司民者之事也懷德

地處邊荒民多喬野自設縣立學校頑梗斂跡然求其家絃戶誦猶未之逮余下車伊始整飭捕務嚴懲賭盜數年來境頗安謐然法令者制治之具禮義者出政之原使非講學明倫漸以陶淑其性情俗奚以上况此地秀良子弟多可造就徒以政著無資往往輟業即有志者不爲俗累又多散處鄉僻無所蹉磨余於是設義學興書院之舉第需欸甚鉅加以政務倥惚遽難酬願戊子春捐廉設義學一所而書院區宇僅存幾有廢莫能舉之勢復於庚寅夏竭力捐廉首先倡率並請本學訓導曹君勸諭闔邑紳富共襄善舉好義者無不踴躍樂輸數月間已集多款遂名書院曰輔翼辛卯二月延師開課甄別生童擇其文

行兼優者送院肄業資膏伙課以科舉之學而旁及於經古策論詩賦務令講求學術檢束身心篤天良葆有恥文風日上且與型俗有裨秋間復邀紳耆分投續捐茲已集有成數遂妥擬章程詳請立案以垂久遠特誌其緣起並鐫樂輸姓名於次用昭激勸古不云乎功待人而成顧力如何耳然觀於既成之後未必悉爲之之難也後之官斯土者踵華增美正難頒量而區區爲一言者欲其鑒余與曹君剗始之非易實力舉行無使久而弛焉且質之肄業諸生厚自愛以免有文無行之譏則尤余與曹君所殷望也夫

興隆寺梁公豁免田租碑

光緒二十三年十五日  
監院緒獄立

孫嶽金

國家優待沙門俾各府州縣設立叢林廣行慈悲意甚渥也然必好善者倡義於前而名望又足繼之庶一方人民胥仰焉此廟自肇建以來舍饘粥施衣鉢及一切締構經營衆施主相與有功然求其輕財重義而了無顧惜者則尤莫過我梁公公字豐年花翎三品銜管理公益局事務儻生平樂善不倦復慷慨好施而斯廟之功德尤著凡於修造動工事公必集衆會議助成義舉此廟舊有房基三段熟地數段歷年納租共市錢五十吊有餘及公蒞事親自稟明將此項施舍在廟以爲香資而特恐久而無憑也遂同換大照以爲券契於是商民無不感焉本街公議會共施錢一千吊整皆公倡爲之力也夫公之功德

其廣如此其名望又赫耀聲明如此而所以惠我沙門者則又本諸心術性情而非弋譽沽名之舉則凡血氣之倫其孰不勉焉樹閭閻之坊表人懷濟世之心印證果於釋迦共切藏修之願則庶幾哉菩提無樹庇蔭彌多慾海有航拯濟者衆其有裨於世道人心也豈鮮淺哉雖然公之功德非其事不傳尤非其人不顯則監院之所關甚重矣當監院執事之始廟中時勢幾不忍言幸賴梁公調恤而監院又能善敷所施不戾於正故能經營擘畫咸就準繩蓋監院之功因梁公而益著實梁公之德賴監院而愈彰微梁公無以成監院之美微監院仍無以遂梁公之心也故具監院之名於梁公之後非敢云媲美梁公也惟

其後之人念茲典型勿敢廢棄撫今追昔不生此疆彼界之思謹小慎微勿忘憂盛危明之懼而監院之功德不泯即梁公之功德常昭即衆商民之功德亦因梁公以並垂不朽也爰乃銘曰惟我公之磊落兮惟自慈祥既施恩於無已兮復錫類之無方其惠我沙門兮德合無疆免輸將於畢世兮更推解以爲常人情於珮璲之惠兮尙不釋於中暘况此沒齒之難報兮究何日而可忘又曰雲山蒼茫兮江水汪洋惟我公之姓氏兮奕葉流芳山之高兮水之長梁公之德不可量

縣立高等小學堂落成記

光緒三十二年九月

趙晉升

自庚子以來朝廷變法自強詔停科舉立學堂海內風行漸著

成效而尤注重小學良以普教育端本原胥於是乎在獨我東省以日俄交鬪未遑也乙巳冬貴州廖公宰斯邑曾集紳耆議籌款建學舍鳩工庀材粗具端緒而公遽以升遷去今春榮公重蒞斯土下車伊始即以開辦學堂爲急務惟事屬創舉監修需人猥蒙同人等謬以鄙人荐而縣尊遽委以承乏伏念學堂者本國家維新之要政亦桑梓開化之先聲義務攸關奚容諉卸遵於三月二十一日從事經始第以料物難齊夏雨多阻遲至九月始葺工且款項無多一切工料均須遷就不惟不敢過事鋪張並不能概求堅緻兼以學堂圖識未經通行規模位置誠恐有不盡愜人意者惟是一磚瓦之微一木石之用未賞不

曲意經營躬親指授此則私衷差堪自信者耳而或謂以社會公捐之欸供國民公益之需雖繁費庸何傷抑知兵燹頻經閭閻凋敝錙銖悉兆姓之脂膏涓滴亦國家之元氣是以競競維持力從撙節較私工爲尤甚而勞與怨所弗敢辭也伏願諸君子肄業此間者受公廬如吾廬視衆物若己物所謂普公德結團體者未必不基於是若以非我固有即污穢殘毀之不恤是同邑而秦越鄙甚亦褊私甚諸君豈其然乎當此時局艱難需才孔急果能品學兼修賢材輩出則斯堂之設且將與鷺湖鹿洞並垂千古矣而鄙人區區之微勞又奚足云至於德業期諸遠大器識務在宏通勿染浮囂勿蹈佻達則又各學堂之要義

勿待鄙人之越俎而陳矣

卡倫屯碑

懷德縣行政公署佈告

爲佈告事前據無量宮監院秦圓林稟稱卡倫地方爲縣城至公主嶺大道原有土橋一座每遇洪潮漲發水平河岸交通隔絕監院體道門慈善之旨情願獨力修建此橋以便行旅當准並分令警團協力保護茲復據該監院稟稱費款小洋一千六百八十元工閱五十日業已竣懇請出示勒碑保護前來本監督查該監院不惜鉅資不辭勞苦熱心公益殊堪嘉尙爲此佈告該地方紳商士庶極力保護遇有損壞隨時修理保此善舉

懷德縣志

卷十五藝文

三十

新京福文盛印書局印

此佈

懷德縣知事尹壽松

中華民國七年五月三日胡永堃敬書

懷德縣知事儲公德政碑

民國十一年公立

趙晉臣

國家設親民之官以衛民而安之也然非有視民如傷者任之則且漠視民瘼而不爲之所衛猶未也安於何有邑侯儲公古所謂視民如傷者也己未冬蒞懷德巖邑也下車伊始即詢民疾苦知邑中防不勝防避無可避者惟盜是患乃本辟以止辟之意嚴緝之有所獲立予訊鞠得實則置之法無枉縱計期月中獲盜蓋百數十人云兼之厲行保甲旣清盜源復絕盜俚



於是數十年我民所疾首痛心而未嘗一日即安者公竟爲之闢桃源焉然而公且歆然謂政在利民僅去其害未已也遂乃振教育清積案善外交添修工廠繕治道塗創設電話提倡儲蓄凡爲民籌罔弗周至傳曰民可與樂成難與謀始推公之心殆謂職分內事皆性分內事吾實心實政蘄無負乎親民之名義而已難易何知焉公家故望族學有淵源年十八筮仕來奉歷鐵開等五縣推官皆廉能有聲茲故勒石俾邑之人知我公所以痼瘵在抱躋斯民於上理者其來有自 公名鎮字鐵生江蘇宜興人頌曰猗歟我公家聲五鳳一麾柳邊甘棠歌頌公始蒞境境內驛騷鋤糧鋤莠樂土樂郊虞治朝歌龔治渤海是

慈惠師是神明宰願公久任俗美化成疇其媿之單父武城

呈文

孔憲熙

呈爲呈請核轉褒揚事竊維任卹睦姻詳於周禮振民育德載於犧經苟能實踐於躬或襄成其事皆有功人心世道可藉以易俗移風茲查有知事外祖梁餘三公現年七十歲係奉天省懷德縣籍當<sub>知事</sub>年十九時先嚴見背家貧失學公以<sub>知事</sub>尙堪造就命入塾同兩孫讀衣食書籍皆資之越數年<sub>知事</sub>童試獲選一應費用公皆優給不稍吝嗣後肄業中校暨應優貢試亦皆由公資助<sub>知事</sub>以窶人子得通籍筮仕爲國效力雖拔擢出自所事長官而所以能讀書應試實皆受公之賜同時公有

遠族之孫名國祚者幼年失怙公爲之延師讀書供給一切國祚甫入泮而科舉即停公納票五千金爲捐一科中書俾有進身之階又光緒甲辰懷德興辦學校以無款不能舉公慨捐二千金助成其事今公年已古稀而慷慨如昔綜觀以上各節教養兼施切韓滉慶門之望本根是庇逾希文瞻族之恩至於肇啓宏規佇盼蔚興杞梓慨捐巨款尤爲蔭溥粉榆值此世風不古之時能爲仗義疎財之舉其行誼實與修正褒揚條例第一條第三第六兩款相符

知事

念一已出身之原暨梁公好義之

勇且其親屬鄰里之在浙者又能具書證明爲此造具事實清冊並加具證明書連同前項證明書暨應繳註冊費銀九元備

懷德縣志

卷十五藝文

三十二

新京福文盛印書局印

文呈請鈞長俯賜察核專案轉咨以獎善人而勵末俗實爲德便謹呈

遼東懷古

榮文達

幽營半壁劃星躔溟渤紆迴日出鮮禹跡有經闢東北舜封無石勒山川島夷猶想名皮地肅慎難尋貢矢年本是強秦威不到誰藏太子助窮燕

其二

雄才漢武拓邊寬汕溟遙書太史官菟郡虛名分四境虎神遺俗紀三韓安邊太守宣威易出塞將軍讓美難莫道度遼征戰苦敢憑劔客靖烏丸

其三

石祥延里起陰謀鸞輅旄頭我豈侯五國妄爭遼水長一星遲  
隕首山秋偏隅坐大如矜豕樸俗難忘是盜牛來去寓賢虛設  
館一帆仍上海天舟

其四

鹿侯吞雹啟鮮卑封往遼東事亦奇名士眼驚命世器隱流胸  
有霸王資江南一馬猶修貢山上雙龍詎足師何用夢祥嫌嚙  
臂有人捫蝨指軍揮

其五

將軍三箭氣飛霜駐蹕山驚草木荒鴨水醋杯澆海表鳳城詩

筆怨遼陽基開鴻範流傳遠物產狼毫文字長但祝惡氛鯨浪  
息屏藩東道進名香

其六

遼水蒼涼起暮雲遼山木葉悵秋墳秦歌宮諷官家事梁籍亭  
燔太子文拊背朔方雄五代亡唇南國悔雙分無家恥作西藩  
客殿瓦醫閭幾夕曛

其七

雄豪起舞酒杯傾金帝詩詞讖汴京五色雲中天子氣萬人江  
上女真名黃龍最恨書生計白馬猶嚴太子兵莫更冬青尋二  
帝瞬看五國亦荒城

其八

驅除諸部事如塵失計前朝鑒更眞葉赫間謀餘戰壘松山哀  
詠屬詩人九邊豻獄長城壞一水鴻溝大厦淪天遣鎬豐佳氣  
滿葱葱烟樹萬年春

秋柳

津亭極目總銷魂冷落青袍怨白門拖地香塵扶舊夢向人涼  
露泣新痕啼鴉多近長橋渚歸燕來商夕照村莫過章臺重回  
首畫樓風雨不堪論  
望到關河覺欲霜生憎搖落傍蓮塘難招畫舫歌時酒愁檢深  
閨嫁日箱十里行宮悲煬帝六橋空水老蘄王秋鶯一段從頭

懷德縣志

卷十五藝文

三十四

新京福文盛印書局印

語髣髴南朝舊教坊

珍重當時綠汁衣殘膏賸馥是耶非風前漢殿愁烟起笛裏陽  
關舊雨稀斜日忍留征馬駐空江猶引塞鴻飛年來敢怨多攀  
折但報王孫願莫違

臨風嫋娜我猶憐鎖遍長條祇晚煙春夢過殘空荏苒舞腰消  
損也纏綿風流張緒誇當日蕭瑟庾郎感暮年一曲豔詞聽不  
得秋山眉黛酒樽邊

再疊原韻

一眺高城欲斷魂續詩吟遍武昌門三春細雨成塵影一夜西  
風蘸水痕無復白花迷酒市好教黃葉憶江村燕鶯老去笙簫

歇斜日虹橋忍再論  
秋信南來白燕霜淡煙和月墜銀塘逢場詞闋愁催鬢出塞書  
成怨啓箱此日流殘洛中水當時曾嫁汝南王向人猶自垂青  
眼曾閱繁華碎錦坊  
曉風消息怯秋衣領略炎涼往事非淮水月明歌席散灞橋人  
遠麴塵稀門前已道藏烏晚陌上誰看去馬飛回首冶春花事  
早六朝如夢故情違  
天涯憔悴故應憐新水河邊有翠煙秋士風流殊落落故人情  
緒尙緜緜曾將張敞爲游侶祇怕王恭負少年忽忽關山吹玉  
笛浪游心醉驛亭邊

懷德縣志

卷十五藝文

三十五

新京福文盛印書局印

三疊原韻

躍馬秋衫悵別魂五雲宮闕苑西門酒人再約猶成侶春事重  
談欲覓痕坐客休歌金縷曲儂家願傍莫愁村文章瘦信真哀  
豔江北江南不可論  
一別金城更幾霜夕陽亭畔是迴塘祇今畫閣疎臨水曾爲油  
車拂到箱袖底漫翻大垂手樽前怕唱小秦王稜陵花月秋孃  
感暮雨肅肅走馬坊  
消夏池塘冷葛衣山川綠酒景初非折枝密意芳菲減顰黛清  
愁領略稀汴水宮蕪蝴蝶瘦姑蘇臺近鷓鴣飛曉風殘月江南  
岸一拍檀槽客夢違

鶯歌珠串本相憐遙訪前游已碧烟舊雨綠蕪江漠漠曲欄紅  
豆思緜緜竹西明月題詩後湖上春風記夢年落葉哀蟬催一  
闋萍因絮果古愁邊

寒上古城懷古

即新集城見古蹟門

趙晉臣

建修何日毀何年興廢難憑父老傳杖策登臨尋故事恨無片  
石紀燕然

其二

艮維王氣鬱山川耶律完顏迭起年此去黃龍百餘里故應鎖  
鑰重雄邊

其三

懷德縣志

卷十五藝文

三十六

新京福文盛印書局印

臨黃建號衆酋并百有三城壯翰屏滿萬兵來如破竹千秋遺  
恨海東青

其四

故國銷沉故壘荒猶餘殘鏃蝕風霜柳條邊外城相屬强半遼  
金血戰場

其五

渡海通金約取燕女眞孰與契丹賢歲輸金幣知多少黃土猶  
埋趙宋錢

其六

冷月荒郊走碧燐何人爲弔老胡墳劇憐五國冰霜域二帝猶

羈客死魂

其七

彈丸遼左固金湯  
金室南遷故未荒  
一自和林張撻伐  
邊庭城堡幾滄桑

其八

東盟東部首歸仁  
公主烏孫誼最親  
不必受降城更築  
於今遊牧半耕屯

流民

歲卯辰間奉直大  
水西北貧民流徙  
吉黑境者自冬徂  
春絡繹於道重繭  
負擔託鉢沿門無  
病且死者比比也  
司牧者知之否

耶

有村皆島嶼無地不龍蛇  
客路三千里沈災十萬家  
愁牽邊驛柳淚滅故園花  
已作吹簫侶敢辭來食差

涕泣辭鄉土飢寒耐客途  
任教門若市忍斫米如珠  
豈望王孫報真成鄭俠圖  
無知小兒女擔負尙胡蘆

噉鴻飛不斷迂路我門過  
僻壤猶如許衝途更若何  
脫身皆樂土容足即行窩  
誰爲謀生殖揮鋤亦荷戈

甌脫艮維懸何人議墾邊  
移民方實塞曠土幾成田  
逃死自遷地好生惟籲天  
却因值荒歉荒服萃人烟

秋登塞城

大塊由來一海漚云何鐵甕又金甌臨風漫讀蕪城賦話到滄  
桑鳥亦愁

荆榛荒處泣銅駝故國河山喚奈何古樹西風秋颯颯城頭猶  
自戰金戈

樓臺人物一時空滿目簫條夕照中千古金湯餘瓦礫經來秋  
月復春風

冬夜塞上旅行

策馬邊城道清宵望眼空斗垣低漠北輿地拓遼東門掩荒村  
月帘飄野店風關山人已老雪迹感飛鴻

寒夜清高氣都歸客子車樹凋風有韻雲斂月生華積雪迷官

懷德縣志

卷十五藝文 三十八

新京福文盛印書局印

渡殘燈認酒家輸他一枝借同夢穩棲鴉

飽嘗行役苦又作夜征人馬氣蒸銀鎧車燈走碧燐沙凝疑碾  
玉地圻屢箝輪愁聽朔風緊塞簾暗沸塵

巖疆三百里日患寇氛侵况屬宵征客能無警備心弓蛇時誤  
影風鶴暗聞音叱馭星馳去無言拂雪鐔

憫農行

癸巳夏五霪雨彌月伏陰生寒雹災繼至邑本巖疆盜氛素熾  
值此荒歉連歲民何以堪感而賦此

叱犢急春耕畢耨遲膏雨一雨抽勾芒歉聲臚萬戶非種忙爲  
鋤節已近端午鳴鳩正喜晴何來商羊舞恰逢甲子辰忽遭雨



師怒倒捲滄海流滂沌灌下土雙丸旋碧空黑雲鎖不吐白晝  
天無光昏昏歷交五緣溪屋作舟入市人乘艫枯苔旣已甦宿  
莽爲之腐一朝陰霾開白日穿花隴畚鍤易耰鋤補屋兼築堵  
何期朔風來玄冥揚神武剪取冰洋冰擲空蹙飛弩殺草甚霜  
華良田條已竄吁嗟我農夫胼胝一何苦水雹重罹災安望多  
黍稌萑苻日滋蔓虎狼紛余侮飢與盜爲媒邊庭無寧宇搔首  
問蒼蒼斯民何薄祐

九日飲古城

天風吹處淨無塵 霜葉凝黃沐雨新 豈謂登山堪避劫  
清秋臨眺本怡人 擬步高蹤太華巔 城頭一覽九秋天

懷德縣志

卷十五藝文

三十九

新京福文盛印書局印

振衣千仞平生志 纔脫塵埃便欲仙  
落霞孤鶩擅詞章故車臨風話馬當願得新詩酬令節樽前分  
韻賦重陽欲仿龍山醉菊觴蕪城雲樹總蒼涼黃花也怨西風  
早未到花開已傲霜鐵騎瑯弓慣射雕胡天故俗說金遼荒城  
不是新亭宴莫弔山河負酒瓢

書懷

倦遊重返故園林眼底風雲變古今旅雁驚霜憐鍛羽寒螿弔  
月抱秋心閒中世事看棋局醉後狂歌拂劍鐔撫罷無弦琴一  
曲羲皇好向枕邊尋

詠史

約金攻遼遼祚絕約元伐金金源滅憑陵華夏幾何年一朝共  
慶仇恥雪奈何二國旣淪胥汴京臨安愈机棹徽欽終羈五國  
城罝曷空喋南州血唇之旣亡齒亦寒木惟先腐虫乃齧盟書  
誰敗釁誰開兩宋外交如一轍嗟嗟花石使者民怨結蟋蟀相  
公國枋窃碑鐫黨人甚漢唐仇視道學甘吳越內政依樣畫胡  
盧果然家法崇紹述杭州歌舞等汴州臥榻鼾眠初不恤忽然  
北軍軍臯亭戰和遷守計無出和林王氣鍾中原禍據完顏與  
耶律莽莽神州騫陸沈神明胄裔奴胡羯一片乾淨土無存一  
塊趙家肉已歿空餘著錄諸遺民首陽山下甘薇蕨冬青詩句  
杜宇悲朱鳥歌聲竹石裂君不見累朝邊患胡爲烈歷代國交

宋尤失嚮晨鉅萬金幣輸暮已半壁河山割矧當羣雄環伺年  
爭倡方野劃分說嗚呼昔日異族今一家金甌無任他族缺

傷亂

一鼓挫強胡尅期蕩羣醜約和縱之歸不殺意何厚何期甫首  
途沿途肆攻掙外兵偃導前亂黨虎躡後烈烈神祝融助虐假  
其手毒燄村復村黑雲捲黃垢迺敢恣凶殘淫掠及男婦片言  
或牴牾性命輕芻狗大軍莫之撻居民焉敢守河柳作仙源田  
禾成逋藪我德愧康成禍恐黃巾受家衆盡嚴裝倉皇駕四牡  
出門僅里許偵騎抵門首河梁古道邊伏莽滋已久居慮燬蝸  
廬行虞投虎口所辛衆志堅相期無相貞風鶴雖頻驚倚劍叱

馭走暮宿望故鄉劫燹灼牛斗

避寇

日晡載孥行言投邑中宿道路一何長晷刻一何促驀地統一  
鳴心膽爲整肅班馬噤悲嘶稚子春聲哭豈果馬行遲爭如人  
意速日愁無戈揮地憾無仙縮晚抵戚屬門門前車擊穀入見  
主人車纍纍載囊篋云欲入城居冀以全骨肉特恐門禁嚴昏  
暮難剝啄今夕恰逢君暫掃愁千斛明朝歌北風携手相隨屬  
曉聞盜入村一夕四家覆擄人如繫囚質之以勒贖命駕且登  
車恨不群醜戮但誓死亦甘那計生爲福冒險亟前行行人效  
忠告前路禾稼叢隱人影彳亍乃飭我戎裝乃窮我耳目草木

盡疑兵如敵臨背腹賈勇陟東臯主僕力皆勦險要一時過弧  
矢韜鞬箠忽聞前導言有衆伏深谷如賊羈兵然一人居高屋  
按轡稍稍前乃知我軍伏詢係偵者云胡馬欲東牧附郭卡數  
重嚴防天驕撲我聞意稍舒庶幾莫予毒

亂定歸里

狼烽千里徹胡邊大有年逢浩劫年亂後人還乾淨土驚餘夢  
穩小遊仙花開故里天然韻月到華堂分外妍尙望渠魁俘馘  
後犁庭早著祖生鞭

胡馬長驅已挫鋒伊誰兵械竟潛供鵲巢奪據將軍恨燕社歸  
飛客子蹤菊酒互申同室慶芸編親啓昨年封從來筆陣千人

掃願託吟毫靖塞烽

釣歌

吞鈎魚羨餌垂釣人羨魚羨魚爲魚美羨餌爲餌腴人物嗜好  
豈殊途奈何一則悅口一捐軀假物爲餌以餌餌術利用誘智  
誠殊忘己之餌以餌餌明蔽於貪計實疏魚乎魚乎餌原爲爾  
設爾何爲餌愚置身水國中何地不江湖魚則游沼如游海釣  
則守竿如守株豈如王孫韝鷹牽犬獵平蕪金丸馬上追殺兔  
與狐爾何不海北游南溟徙搏風直上三千里寧虞龍伯國連  
鰲施絕技又何不燒雷火躍龍門飛升九五天那怕任公子餌  
瞎投長竿即不然而唼柳花戲蓮葉混沙虫習伏蟄網罟莫之

懷德縣志

卷十五藝文

四十二

新京福文盛印書局印

櫻鈎距更何懾惜爾不能爾條罹恒沙劫吁嗟乎癡龍受豢且  
防屠名駒就繫爲生芻何況肥甘藏醜毒類因口腹喪頭顱魚  
乎魚乎見幾不早見利趨朝侑黃公壚暮供郇公廚刀俎皆自  
取何謂余無辜爾不見王者之師帝者友也曾渭水桐江作釣  
叟無尤且自咎

對書歎

書惟英年讀最好而我勤讀愧不早書豈畢生讀能了况我耽  
讀年已老神衰有典祖皆忘目暗無書字不小釋夙惑若償夙  
逋得異聞如獲異寶雖非書淫書癖並書癡却似魔障糾纏難  
禳禱時惹室人笑且嗔何事孜孜尋苦惱把卷縱爲舉子忙公

車豈上長安道我聞此語亦云然結習爭如難自矯如烟如海  
卷軸多非斗非石才華少歲序千金買不回墨汁五斗飲難飽  
我願爲邊孝先終日眠收集杜庫曹倉鄴候架都貯復筥無遺  
編一年七夕一坦曬何須日披錦帙抽牙籤不然化爲白蟬寄  
縹緗生長書叢書爲糧珍羞天祿石渠品饜飫嫿嬛宛委香食  
神仙字且仙去豈書生老死牖下所敢望我自癡心挾奢願可  
能凡骨三生換恒恐夢庚吞篆不世才較他科名富貴天尤靳  
吁嗟乎世充沈水秦皇燒後世禁毀嚴科條未知冢中之書井  
中史幾多秘籍埋蓬蒿安得我生三萬六千日將未讀未見之  
冊爲之萬目縱觀萬手鈔庶奇字不更問於揚子而入門不見

阻於崔儵

感事

世載經營說海防居然戈甲闕蕭牆稱兵亂豈方安史守土人  
偏笑許張鄂渚衣冠潛滬漢楚江烽火澈川湘如何半壁南天  
遠條作羣雄逐鹿場  
黃農帝國五千年底事興衰判亞歐伺釁人方鼯臥榻操戈敵  
竟起同舟空聞聖主寬投首寧見將軍誓斷頭爲問濟川誰作  
楫拍天駭浪正橫流

五洲成迹導前塵趨步如何覆轍循川瀆隄防終猛潰龍蛇蟄  
伏總求伸蘆潛伍相仇尋楚木徙商君治遜秦摧抑民權誰釀

禍漫將黔首誤黃巾  
柱石東南重寄膺闖茸才具可能勝夢魂阿堵和嶠癖氣節銷  
磨味道棱三窟巖林營狡兔九霄風雨鍛搏鵬笑渠網已吞舟  
漏逮問猶爲白簡登  
變通籌備總虛文管蔡由來穢德聞鞠部清歌娛白雪柏臺直  
諫斥朱雲封疆利用仇民吏海陸虛誇愛國軍政治維新人自  
舊誰知首禍卽元勛  
龍興薄海懾天威芒碭雄風竟式微軍典王孫誇宿衛壇登孺  
子誤戍機長楊大閱師期阻細柳留屯戰策違尙望長城檀道  
濟同袍眞箇賦無衣

讀退政詔有感

一籌誰爲九重紓九鼎輕如一介輸賓客王家眞杞宋倦勤帝  
位小唐虞宮廷有主權稱制柱石何人任託孤玉步已更名錄  
在果然揖讓勝征誅  
客星炯炯斗垣隕退政倉皇詔語哀二百年恩深雨露十三省  
變迅風雷寬閒天子名虛擁寄寓皇家例特開明遁滇南元朔  
北名園猶是小蓬萊  
依然綸綍九天宣意自悽惶體自尊種族幾曾消滿漢歷年原  
已邁金元空餘玉牒綿皇祚賴有金錢報國恩最是王風夷邶  
衛那堪回首望中原

紅果銜來帝祚開闢門潭上白山隈威行雷電興王檄運際風  
雲佐命材一劍龍顏安漢鼎千金駿骨市燕臺當年豐鎬明良  
遇漫向穹蒼向劫灰

雜感六首

五洲教育日文明尊孔尊經制漸更俎豆官虛秦博士詩書澤  
斬魯諸生儒宗寧藉廟祠重吾道轉因忠孝輕莫更異端攘二  
氏護持新令出神京  
鼎革人才盡楚翹功名拔地倚青宵邦基飢斃支傾厦宦海風  
雲湧怒潮黨派惟知仇蜀洛侵陵那復問苻姚勸君細繹同舟  
義一躍共和莫浪驕

胡馬南來忽抵洮專征上將擁旌旄羽書絡繹邊風緊刁斗森  
嚴旅雁高漢塞勛名思衛霍秦關鎖鑰重恬驚如何三百年綏  
服佛子偏揮戒殺刀

搜車索馬一朝訂軍事勾通說日蒙敵國先聲秦俗悍官場故  
智宋人聾詰奸寧慮關津阻出境居然斥堠通內政外交究誰  
屬桃僵李代太冬烘

軍裝驀地運強藩謬託鎡基備墾屯豈爲龍興資朔漠還教鹿  
逐敝中原羯羗割據空紛擾秦楚連衡總并吞不有邊城良將  
在居然揖盜盡開門

飛電傳來密令行楚囚授首夜三更商郊也奮揚鷹勇漢將空

悲走狗烹彭豕論功爭黑白溫犀燭怪洞幽明上書質問渾多  
事黨議奚煩月旦評

悼花篇

昨朝花盛開色與香俱好今日再看花過盛已漸槁豈真司花  
神斬人眼福飽消本長所基苑實枯之兆有盛而無衰化工窮  
神巧絜彼錦繡叢何人不傾倒或炫美人粧或生文筆藻或散  
天女香或勤仙僮掃旣蒙相賞多何憾閱時少獨有愛花人賭  
之傷懷抱杖頭一以墜綠章空祈禱羯鼓難更催剪綵誰更造  
優曇剎那間來去一生了綿茵固無言藩溷亦奚惱是知富貴  
花不如幽芳草然使花解語應亦辦之早人惜空花空花笑老

人老花事逐歲新人事年頻擾灼灼天台花歸來迷晨肇百年  
旦暮耳與花孰壽考